

Lagi ban pecah di Batu 5

Air melimpah masuk ke dalam rumah namun tiada mangsa dipindahkan

■ NORAZIHAN MD GHAZALI

KAPAR - Memasuki hari terakhir air pasang besar, sebuah lagi ban di Jalan Kebun Baru, Batu 5 Jalan Kapar rosak dirempuh air pasang besar awal pagi semalam.

Ketua Balai Bomba dan Penyelamat Sungai Pinang, Zaidi Ahtan berkata, kerosakan itu dikesan bomba sekitar jam 5.30 pagi.

"Air mulai melimpah masuk ke kawasan kediaman penduduk melalui struktur yang pecah itu.

"Bagaimanapun tiada mangsa yang dipindahkan dan air beransur surut sekitar jam 8 pagi," katanya.

Terdahulu, di kawasan yang sama, ban dilaporkan turut pecah hingga menyebabkan air merempuh masuk ke

kediaman penduduk pada hari kedua dan ketiga fenomena air pasang besar berlaku.

Sementara itu, Ketua Bomba Zon Klang, Amer Haizal Sahak berkata, pihaknya akan memberi tumpuan di lokasi Jalan Kebun Baru, Batu 5, Jalan Kapar bersama agensi lain dalam memantau keadaan air pasang besar di situ yang masih dalam keadaan berjaga-jaga.

Menurut beliau, sehingga semalam paras air di Jalan Kebun Baru, Batu 5, Jalan Kapar masih berada pada paras 5.5 meter.

"Kita jangkakan ia akan menurun antara 4.8 hingga 5.0 meter pada awal pagi nanti.

"Kita harap agar paras 5.0 meter itu kekal sehingga Jumaat ini," katanya kepada *Sinar Harian*.



AMER HAIZAL

Menurutnya, keputusan sama ada pusat pemindahan di Dewan Serbaguna Datuk Ahmad Razali, Batu 4, Jalan Kapar ditutup atau sebaliknya hanya akan ditentukan Jumaat ini berdasarkan keadaan paras air.

"Pada masa sama, kita akan teruskan tinjauan di kawasan terlibat," katanya.



Ban pecah lagi pada hari terakhir fenomena air pasang besar semalam.